

# Dr. Mahathir terima Ijazah Kehormat Doktor Pemikiran Islam U M

JM 28 JAN 2004

KUALA LUMPUR 27 Jan. — Tun Dr. Mahathir Mohamad akan dianugerahkan Ijazah Kehormat Doktor Pemikiran Islam oleh Universiti Malaya (UM) pada 30 Januari ini.

Naib Canselor UM, Prof. Datuk Dr. Hashim Yaacob berkata, penganugerahan itu bagi menghargai sumbangan dan pemikiran Dr. Mahathir dalam membangunkan ekonomi, pentadbiran dan politik Islam di negara ini dan di peringkat antarabangsa.

Katanya, majlis konvokesyen khas bagi penganugerahan itu akan diadakan di Dewan Tunku Canselor bermula pukul 9.30 pagi dan ia terbuka untuk orang ramai.

“Dr. Mahathir adalah pemikir yang hebat dan pemikirannya banyak berlandaskan lunas-lunas Islam terutama dalam gesaannya kepada orang Melayu supaya menuntut ilmu,” katanya di sini hari ini.

Menurutnya, bekas Perdana Menteri itu memartabatkan negara melalui penguasaan ilmu dan sentiasa menggesa rakyat menuntut ilmu sehingga ke tahap tertinggi.

“Sepanjang kepimpinan Dr. Mahathir, katanya, banyak institusi pendidikan dan kewangan yang dilaksanakan berlandaskan Islam.

“Antaranya Universiti Islam Antarabangsa Malaysia (UIAM), Kolej Universiti Islam Malaysia (KUTIM) dan Bank Islam,” jelas beliau.

Selain itu menurut Hashim, Dr. Mahathir juga memperkenalkan dinar emas sebagai salah satu usaha membantu ekonomi negara-negara Islam.

“Beliau turut menekankan sains dan teknologi untuk kemajuan negara dan ini juga adalah selaras dengan lunas Islam,” katanya.

Menurut beliau, UM melihat Dr. Mahathir sebagai tokoh yang banyak memainkan peranan dalam memperkukuhkan ekonomi, kestabilan politik, perpaduan kaum dan pendidikan. •

“UM merasakan penganugerahan ini adalah satu pengiktirafan terhadap banyak jasa telah dicurahkan oleh Dr. Mahathir,” katanya.